

Kalaallit Nunaannut nunatsinnilu angalanermi piumasaqaatit pillugit Namminersorlutik Oqartussat nalunaarutaat

Nappaatit tunillaassortut akiorniarlugit iliuutsit pillugit Inatsisartut peqqussutaanni nr. 20 12. november 2001-imeersumi, Inatsisartut inatsisaatigut nr. 1, 1. april 2020-meersutigut allanngortinneqartumi, §§ 2 a, 6, 6 a, 12 a, 12 b, 12 c, 21 a aamma 21 b aamma § 29 imm. 2 aamma 3 malillugit aalajangersarneqarpoq:

Atuuffia

§ 1. Nalunaarut Kalaallit Nunaata avataaniit angalasunut nunattalu iluani angalasunut atuutissaq.

Atuuffiata killilerneqarnera

§ 2. Nalunaarummi matumani aalajangersakkat ilaat tamarmilluunniit inunnut inuiaqatigiinnut pingaarutilimmik sulialinnut atuutsinnejassanngitsut aalajangerneqarsinnaavoq.

Imm. 2. Inunnut Kalaallit Nunaanni Politiini sulisunut Kalaallit Nunaanni Politimesteri imm. 1 naapertorlugu aalajangiisassaaq.

Imm. 3. Inunnut Issittumi Sakkutooqarfimmi tassanilu immikkoortortaqarfinni sulisunut Issittumi Sakkutooqarfimmi pisortaasoq imm. 1 naapertorlugu aalajangiisassaaq.

Imm. 4. Inunnut Peqqinnissaqarfimmi sulisunut Nunatta Nakorsaneqarfia imm. 1 naapertorlugu aalajangiisassaaq.

Imm. 5. Inunnut imm. 2-4-mi taaneqanngitsuni sulisunut, Nunatta Nakorsaneqarfia imm. 1 malillugu aalajangiisassaaq.

Imm. 6. Nunatta Nakorsaneqarfiaita nalunaarummi matumani aalajangersakkat ilaat tamaasaluunniit peqqinnissaqarfimmi katsorsarneqartunut imaluunniit, pissutsit allat peqqinnissakkut sulianut immikkut illuinnartut atuutsillugit, inunnut ataasiakkaanut atuutsinnejassanngitsut aalajangersinnaavaa.

Imm. 7. Inuit pinerluttunik isumaginnittooqarfimmit nakkutigineqartut Pinerluttunik isumaginnittooqarfimmi pisortaq § 6 imm. 1 malillugu immikkut akuersissuteqarsinnaavoq.

Imm. 8. Nalunaarut eqqartuussivinnut atuutinngilaq.

Timmisartumi Kalaallit Nunaannukartussami ilaasunut piumasaqaatit

§ 3. Angalasut marlunnik sinnerlugilluunniit ukiullit piumasaqaatini tulliuttuni ataaseq naammassippassuk aatsaat timmisartumi Kalaallit Nunaannukartussami ilaaqqusaapput:

- 1) Inuit Kalaallit Nunaanni najugaqartut imm. 2 naapertorlugu najugaqassutsimut aammalu Covid-19-imik PCR atorlugu nappaateqannginnermut uppernarsaassapput.
- 2) Inuit Kalaallit Nunaanni najugaqanngitsut aamma 12-inik sinnerlugilluunniit ukiullit Covid-19-imut tamakkiisumik kapitissimassapput tamatumunngalu uppernarsaammik aamma Covid-19-imik PCR atorlugu nappaateqannginnermut uppernarsaammik takutitsisinnaassapput. Akiuussutissanik Europami nakorsaatnik nakkutilliisuniit, European Medicines Agencymit (EMA) akuerisaasunik akiuussusertinnerit taamaallaat akuerisaapput.
- 3) Inuit Kalaallit Nunaanni najugaqanngitsut marluk 11-illu akornanni ukiullit Covid-19-imik PCR atorlugu nappaateqannginnermut uppernarsaassapput.

Imm. 2. Najugaqartut tassaapput inuit aalajangersimasumik nunatsinni najugaqartut, aalajangersimasumik najugaqalernissaq siunertaralugu maanga nuuttut kiisalu inuit maani nunami piffissami sivisuumi suliartortut.

Imm. 3. Nunatsinnut angalasut inummut tunillatsissimasumut qanumut attaveqarsimanermi kingorna tunillatsinnissamut aarlerinartorsiorsimasutut najukkami oqartussanit ilisimatinneqartut Kalaallit Nunaannut aallannginnerminni timmisartumut ikitinnatik sapaatip akunnera ataaseq sioqqullugu Covid-19-imik PCR atorlugu nappaateqannginnermik uppernarsaatinik marlunniq tulleriinnik takutitsissapput. Misissortinneq siulleq tunillatsissimasumik attaveqareernerup kingorna ullut sisamat qaangiunnerani pissaaq. Misissortinnerup aappaa misissortinnerup siulliup kingorna ullut marluk qaangiunneranni pissaaq.

Imm. 4. Covid-19-mut PCR atorlugu tunillatsissimannginnermut uppernarsaat, misissortittup aqqa, qanga misissortissimanerluni aamma misissuisoq pillugu ilisimatitsissutigineqassaaq. Misissortinneq napparsimmavimmi peqqissaavimiluunniit assigisaanilu Nunat Avannarliit ilaanni, EU-mi, EØS-imí UK-miluunniit suliarineqarsimassaaq Kalaallillu Nunaannut aallarnermi ullut marluk (akunnerit 48-it) sinnerlugit pisoqaassuseqassanani taamaattorli § 21 imm. 2 takuuq.

Imm. 5. PCR atorlugu Covid-19-imut tunillatsissimannginnermut misiliut, Nunatta Nakorsaneqarfianit piumasaqaatit aalajangersakkat naammassisssavai.

Imm. 6. Nunatta Nakorsaneqarfia imm. 1-4-mit immikkut akuersissuteqarsinnaavoq.

Imm. 7. Imm. 1-ip maleruarneqarnissaata qulakkeernissaa angallassisumvik piginnittup akisussaaffigaa.

Umiarsuit umiarsuarnilu ilaasut Kalaallit Nunaannut tikittunut malittarisassat immikkut ittut atuuffi

§ 4. Inuit umiarsuarni Kalaallit Nunaanni talittarfimmut tikittunut ilaasut nunamukartullu nalunaarummi §§ 11, 13 aamma 14 naapertorluginit nunamut tikittutut isigineqassapput, matumanit umiarsuaq Kalaallit Nunaannut tikitsinnani ulluni kingullerni 14-ini nunami allami imaluunniit Danmarkimi imaluunniit Savalimmiuni talittarfimmut talissimappat arlaatigulluunniit sumiiffinnit taakkunanit inunnik ikisoqarsimappat.

Imm. 2. Inuit umiarsuarmut ilaasut umiarsuup Kalaallit Nunaanni tulaqqanerani nunameersunik 2 meterit ataallugit qanitsigalutik attaveqateqassagunik § 10 naapertorlugu qanermut imaluunniit kiinnamut assiaquteqarnissaat piumasaqaataavoq.

Imm. 3. Umiarsuit nunatsinnukartigatik ulluni 14-ini kingullerni nunani allani, Danmarkimi, Savalimmiuniluunniit tulaqqasimanngippata allatulluunniit iliornikkut sumiiffinnit taakkunanit ilaasunik ikiffingeqarsimanngippata, taava inuit umiarsuarni ilaasut Covid-19-imik tunillanneqarsimanngitsutut

naatsorsuutigineqassapput, inulli nappaammut ersisteqarpat tamanna naatsorsuutigineqassanngilaq. Umiarsuaq ilaasullu nunat tamalaat akornanni angalaartut pillugit aalajangersakkanut ilaatinneqarput.

§ 5. Umiarsuit ilaasartaatit, taakkununnga ilanngullugit umiarsuit takornarianik angallassisutit, Danmarkimi Savalimmiuniunuunniit tulaqqasimappata arlaatigulluunniit ilaasunik ikiffigineqarsimappata nunatsinnukartigatik ulluni kingullerni 14-ini nunat allat umiarsualiviini tulaqqasimappata Nunatsinnut tulassinnaangngillat. Inerteqqut nunap immikkoortuanut tamarmut atuuupoq, matumanilu imartamut, taamaattoq nunat tamalaat akornanni pisussaaffit ataqqillugit. Oqaaseqatigiinni siullermi aappaanilu taaneqartup naammassinninnissaa angallatip piginnittuata akisussaaffigaa.

Imm. 2. Nunatsinni Nakorsaaneqarfik imm. 1-imik immikkut akuersissuteqarsinnaavoq.

Imm. 3. Imm. 1-imi inerteqqut apeqqutaatinnagu, imm. 2 naapertorlugu umiarsuarnut immikkut akuersissuteqanngitsunut inerteqqutaanngilaq:

1) Teknikkimut tunngatillugu tulanneq, matumani inuttanik ilaasunilluunniit nunamut niusoqarnani, imaluunniit inunnik avataaneersunik umiarsuarmut ikisoqarnani, kiisalu

2) umiarsuarmi ajornartoornermi, motorip ajutornerani, ikuallattoornermi assingusumilluunniit pinasuartumik pisoqarnerni tulakkasuarneq.

Imm. 4. Imm. 1 umiarsuarnut aalajangersimasumik aqquteqarlutik Nunatta umiarsualiviinut tulattartunut taakkunanngalu avalattartunut atuutinngilaq.

Nunap killeqarfiata iluani angalanermi piumasaqataatit

§ 6. Inuit sumiiffinniit nunap killeqarfiata iluani sumiiffimmut allamut angalasut, Covid-19-imut tamakkiisumik akiuussuserneqarsimanermik imaluunniit Covid-19-imut tunillatsissimannginnermik upernarsaammik takutitsisinnaassapput.

Imm. 2. Inuit tullinnguuttut makkut imm. 1-imi piumasaqaatinut ilaatinneqanngillat:

1) Inuit marluk inorlugit ukiullit.

2) Inuit Covid-19-imut illoqarfinni nunaqarfinniluunniit aallannginnerminni misissortinnissamut periarfissaqanngitsut, taamaattorli §§ 7, 8 aamma 9 takuu.

Imm. 3. Imm. 1-ip maleruarneqarnissaata qulakkeernissaa angallassisumvik piginnittup akisussaaffigaa.

§ 7. Inuit § 6, imm. 2 nr. 2-mi pineqartut Covid-19-imik tunillanneqarsimannginnertik upernarsaqqaarnagu aaqqissuussanut, nalliuottorsiornernut, sammisaqartitsinernut assigisaanulluunniit peqataaqqusaaqngillat. Matumani illup iluani, silami, pisortat inuillu katerittarnerat, aaqqissuussinerit pisussallu il.il. pineqarput.

Imm. 2. Pisortat suliffeqarfiutaanni assigisaanilu isersimanermut, inuit inatsisitigullu pisussaatitaasut pisinnaatitaasullu tamanut ammasuni isersimanermut aamma pisortat namminersortullu utoqqarnik paqqinnittarfiinut napparsimavinnulluunniit isersimanermut imm. 1-imi inerteqqut aamma atuutsinneqassaaq. Taamaattorli qanermut kiinnamulluunniit assiaqutit atorlugit Covid-19-imut misissortinnissaaq, ulluinnarni nioqqutissanik pisiniarnissaq allallu pisariaqavissut allanit isumagineqarsinnaanngitsut isumaginissaat akuerineqarput.

Imm. 3. Peqataasut taamaallaat inoqtigiuppata inissiamut imm. 1 atuutissanngilaq.

Imm. 4. Immikkoortut 1 aamma 2 katersuunnernut politikkikkut allatulluunniit isummersornissamik siunertalinnut atuutinngillat.

§ 8. Inuit § 6, imm. 2, nr.2-mi, taamaattorli imm. 5 takuuk, pineqartut tikiffissaminut tikereerunik Covid-19-imut misissortissinnaassapput, taamaattorli § 9 takuuk.

Imm. 2. Imm. 1-imi misissortinnej pineqartoq nappaateqannginnermik uppernarsaappat inuk pineqartoq Covid-19-imik tunillanneqarsimannngitsutut isigineqassaaq.

Imm. 3. Misissuinermi nappaammik nassaartoqarpat Nunatsinni Nakorsaneqarfiup Peqqinnissaqarfiullu innersuussutaat malinneqassapput.

Imm. 4. Inuk Covid-19-imik nappaammut misissortingippat § 7-mi inerteqquq Kalaallit Nunaannut tikinnermiit ullauni 14-ini atuutissaaq. Inuk Kalaallit Nunaannut tikinnerminit ullauni 14-it sinnerlugit Covid-19-imik nappaateqarnermut ersiuteqarsimannngikkuni Covid-19-imik tunillanneqarsimannngitsutut naatsorsuutigineqassaaq.

Imm. 5. Inuit marluk aqqanillullu akornanni ukiullit Covid-19-imut illoqarfinni nunaqarfinniluunniit aallannginnerminni misissortinnissamut periarfissaqanngitsuniittut, aamma ullauni 14-it kingullit Covid-19-imik ilisimaneqanngitsumik tuniluuttoqarsimannngippat.

§ 9. Inuit § 6, imm. 2, nr. 2-mi pineqartut, illoqarfinnut imaluunniit nunaqarfinnut tikittut, Covid-19-imullu misissortinnissamut periarfissaqanngitsut, inerteqquq § 7, tikinnermiit ullauni 14-ini killilersuut atuuppoq.

Imm. 2. Inuk Kalaallit Nunaannut tikinnerminit ullauni 14-it sinnerlugit Covid-19-imik nappaateqarnermut ersiuteqarsimannngikkuni Covid-19-imik tunillanneqarsimannngitsutut naatsorsuutigineqassaaq.

Qanermut imaluunniit kiinnamut assiaquteqarnissamut piumasaqaat

§ 10. Angalasut aqqaneq-marlunniq sinnerlugillu ukiullit kiisalu saqisut timmisartumi umiarsuarmilu ingerlaartumi qanermut imaluunniit kiinnamut assiaquteqassapput. Piumasaqaatip maleruarnissaa angallatip piginnituata akisussaaffigaa.

Imm. 2. Imm. 1-imi piumasaqaat inunnut angallassisummi ineqqaniittunut assigisaaniittunulluunniit aammalut ilasunut illoqatigisamik saniatigut ilasunuk allanik attaveqarsimannngitsunut atuutsinngilaq.

Imm. 3. Inuit tamarmik aqqaneq-marlunniq sinnerlugillu ukiullit mittarfinniittut, aallariartortarfinniittut/tikittarfinniittut assigisaaniittullu qanermut imaluunniit kiinnamut assiaquteqassapput. Piumasaqaatip maleruarnissaa inuup akisussaaffigaa.

Imm. 4. Timmisartoqarfinni, aallariartortarfinni/tikittarfinni assigisaannilu angalasunik attaveqarlutik sulisut qanermut kiinnamulluunniit assiaqutinut sulisut angalasullu akornanni, plastikimik igalaaminermilluunniit assiaqusiisoqarsinnaavoq. Piumasaqaatip maleruarnissaa sulisitsisup akisussaaffigaa.

Imm. 5. Qanermut imaluunniit kiinnamut assiaquteqarnissamut piumasaqaat ilisimassutsimik annikillisimasunut, timikkut tarnikkulluunniit sanngiitsunut, allamilluunniit peqquteqarlutik qanermut kiinnamulluunniit assiaquteqarsinnaanngitsunut atuutinngilaq.

Imm. 6. Qanorluunniit immikkoortuni 1-imi 3-miluunniit allaqqaqasoqarluarpas, peqqutissaqarluarpas qanermut kiinnamulluunniit assiaqutit ilaannakortumik tamakkiisumilluunniit peeqqaneqarallarsinnaapput, assersuutigalugu:

- 1) Piffissami sivikitsumi nerinermi imaluunniit imernermi, tamanna angallammi, mittarfiup illorsuartaanni assigisaannilu inerteqqutaanngippat.
- 2) Nakorsaatitornermi.
- 3) Qarngit aalaneratigut atuaasartumik oqaloqateqarnermi.
- 4) Qanermut kiinnamulluunniit assiaqutit anersaartorniarnermut ajoqutaappata ipianngulersitsippataluunniit.
- 5) Politiit kinaassutsimik uppermarsaaneranni.

§ 11. Kalaallit Nunaannut angalasut aqqaneq-marlunnik sinnerlugillu ukiullit nunatsinnut tikinnerminnit qanermut kiinnamulluunniit assiaquteqartassapput:

- 1) timmisartoqarfimmuit, umiarsualivimmuit assigisaannilu pingaarnertut najugarisaminntut angalanerminni,
- 2) 2 meterit ataallugit inunnut allanut qanitsigalutik pingaarnertut najugarisaminntut Covid-19-imut misissuivimmukarnerminni, aammalut
- 3) pingaarnertut najugarisami avataaniikkunik inunnulu allanut attaveqarflusuni 2 meterit ataallugit qanitsigissagunik.

Imm. 2. Qanermut kiinnamulluunniit assiaquteqarnissamut piumasaqaat inuup Covid-19-imik tunillatsissimanngitsutut naatsorsuutigineqalernissaata tungaanut atutissaaq, § 14, imm. 4 imaluunniit 6 takukkit. Piumasaqaat taanna § 15 naapertorlugu nunatsinnut angalasunut tamakkiisumik akiuussuserneqarsimasunut atuutinngilaq.

Imm. 3. Qanermut imaluunniit kiinnamut assiaquteqarnissamut piumasaqaat ilisimassutsimik annikillisimasunut, timikkut tarnikkulluunniit sanngiitsunut, allamilluunniit peqquteqarlutik qanermut kiinnamulluunniit assiaquteqarsinnaanngitsunut atuutinngilaq.

Imm. 4. Qanorluunniit immikkoortuni 1-imi 2-miluunniit allaqqasoqarluarpas, peqqutissaqarluarpas qanermut kiinnamulluunniit assiaqutit ilaannakortumik tamakkiisumilluunniit peeqqaneqarallarsinnaapput, tamatumunnga ataani allaqqasut ilangullugit:

- 1) Piffissami sivikitsumi nerinermi imaluunniit imernermi, tamanna angallammi, sumiiffimmi assigisaannilu inerteqqutaanngikkuni.
- 2) Nakorsaatitornermi.
- 3) Qarngit aalaneratigut atuaasartumik oqaloqateqarnermi.
- 4) Qanermut kiinnamulluunniit assiaqutit anersaartorniarnermut ajoqutaappata ipianngulersitsippataluunniit.
- 5) Politiit kinaassutsimik uppermarsaaneranni.

§ 12. Qanermut assiaqutit tassaapput qanermut qinngamullu assiaqutit ataasiartakkat imaluunniit annoraaminermik sanaat allunaasamillu tasisartumilluunniit siutinut ikkuttartut imaluunniit niaqqup tunuatungaani qilertartut kiinnamullu attuumasut.

Imm. 2. Kiinnamut assiaqutit tassaapput isinut, qanermut qingamullu assiaqutit plastikimik sanaat kiinnamut attuumanngitsut.

§ 13. Angalasut timmisartukkut Kalaallit Nunaannut tikittut Covid-19-imik tunillanneqarsimannginnertik uppernarsaqqaarnagu aaqqissuussanut, nalliuottorsiorernut, sammisaqartitsinernut assigisaanulluunniit peqataaqqusaanngillat. Matumani illup iluani, silami, pisortat inuillu katerittarnerat, aaqqissuussinerit pisussallu il.il. ilaatinneqarput.

Imm. 2. Tamakkiisumik akiuussuserneqarsimasut akiuussutissamik kapitissimanerminnut uppernarsaasinnaasut Covid-19-imillu napparsimanermut ersiuteqanngitsut napparsimanngitsutut isigineqassapput.

Imm. 3. Imm. 1-imi inerteqqut pisortat suliffeqarfutaanni assigisaanilu isersimanermut, inuit inatsisitigut pisussaatitaasut pisinnaatitaasullu tamanut ammasuni isersimanermut aamma pisortat namminersortullu utoqqarnik paaqqinnittarfiinut napparsimavinnulluunniit isersimanermut inerteqqut aamma atuutsinnejassaaq. Taamaattorli qanermut kiinnamulluunniit assiaqutit atorlugit Covid-19-imut misissortinnissaq, ulluinnarni nioqqtissanik pisiniarnissaq allallu pisariaqvissut allanit isumagineqarsinnaanngitsut isumaginissaat akuerineqarput.

Imm. 4. Peqataasut taamaallaat inoqutigiippata imm. 1 inissiamut atuutissanngilaq.

Imm. 5. Immikkoortut 1 aamma 3 katersuunnernut politikkut allatulluunniit isummersornissamik siunertalinnut atuutinngillat.

§ 14. Nunatsinnut angalasut Kalaallit Nunaannut tikereernerup kingorna ullut tallimassaanni kingusinnerusukkulluunniit Covid-19-imut misissortissinnaapput, taamaattorli imm. 2 aamma 3 takukkit.

Imm. 2. Nunatsinnut angalasut Covid-19-imut akiuussutissamik tamakkiisumik kapitissimasut Kalaallit Nunaannut tikinnermi kingorna misissortissanngillat. Taamaakkaluartoq angalasoq aperineqaruni akiuussutissamik kapitissimanini uppernarsassavaa. Angalasup akiuussutissamik kapitissimanini uppernarsarsinnaanngikkuniuk, angalasup inunnut akiuussutissamik kapitissimannngitsunut malittarisassat maleruassavaai.

Imm. 3 Meeqqat marluk inorlugit ukiullit piumasaqaammi imm. 1-imi aamma 6-imi ilaatinneqanngillat.

Imm. 4. Imm. 1-imi misissortinneq pineqartoq nappaateqannginnermik uppernarsaappat inuk pineqartoq Covid-19-imik tunillanneqarsimannngitsutut isigineqassaaq.

Imm. 5. Misissuinermi nappaammik nassaartoqarpat Nunatta Nakorsaaneqarfiata Peqqinnissaqarfiullu innersuussutaat malinnejassapput.

Imm. 6. Akiuussusersimannngitsut Covid-19-imut misissortinngikkunik § 13-mi inerteqqut Kalaallit Nunaannut tikinnermiit ulluni 14-ini atuutissaaq. Inuk Kalaallit Nunaannut tikinnerminit ullut 14-it sinnerlugit Covid-19-imik nappaateqarnermut ersiuteqarsimannngikkuni Covid-19-imik tunillanneqarsimannngitsutut naatsorsuutigineqassaaq.

§ 15 Inuk Covid-19-imut tamakkiisumik akiuussuserneqarsimasutut isigineqassaaq inuup akiuussuserneqarsimanerup kingorna ullut 14-it qaangiunneranni tamanna uppernarsarsinnaappagu.

Imm. 2. Nunatta Nakorsaaneqarfiata akiuussuserneqarsimanermut uppernarsaatit sorliit akuerisaanersut aalajangissavaai.

§ 16. Inunnut siusinnerusukkut Covid-19-imik tunillatsinnikuusimasunut PCR-ilu atorlugu misissortinnikkut Covid-19-imik tunillatsissimanerminnik uppernarsaasinnaasunut, piffissami uppernarsaatip atorneqarnerani minnerpaamik ullunik 14-inik annerpaamillu sapaatit akunnerinik aqqaneq-marlunnik pisoqaassusilimmik uppernarsaasinnaasunut tamakkiisumik akiuussuserneqarsimasunut malittarisassat atuuttut assingi atuutsinneqarput.

Imm. 2. Inunnut siusinnerusukkut Covid-19-imik tunillatsinnikuusimasunut tikinnermennilu PCR atorlugu misissortereernermikkut Covid-19-imik tunillatsissimanermennillu minnerpaamik ulluni 14-ini annerpaamik sapaatit akunnerini 12-inik pisoqaassusilinnik uppernarsaasinnaasunut, Covid-19-imik nappaateqannginnermut uppernarsaanermik piumasaqaat atuutinngilaq.

Imm. 3. Uppernarsaat suna uppernarsaatitut akuerisatut atorneqassanersoq Nunatta Nakorsaaneqarfiata aalajangersinnaavaa.

§ 17. Covid-19-imut uppernarsaatitut akuerisaq PCR – imaluunnit antigenest atorlugu tunillatsissimannginnermut uppernarsaatitut paasineqassaaq, tamanna peqqinnissaqarfimmit imaluunniit peqqinnissaqarfik sinnerlugu imaluunniit inuit inatsisitigullu pisussaataitaasut pisinnaatitaasullu Nunatta Nakorsaaneqarfianit akuersisummiik tigusaqarnikumit misissorneqarsimassaaq, annerpaamillu 48 tiiminik pisoqaassuseqassalluni.

Illoqarfit aamma nunaqarfit ilisimaneqanngitsumik tunillaassuuffiusut saqqummiunneqarneri

§ 18. Illoqarfit aamma nunaqarfit ulluni kingullerni 14-ini Covid 19-imik ilisimaneqanngitsumik tunillaassuuffiusuni, Nunatta Nakorsaaneqarfianit corona.nun.gl.-imi saqqummiunneqassapput, takuuk § 8, imm. 5.

Imm. 2. § 8, imm. 5 malillugu piumasaqaatit saqqummiunneqarnermiit 2 tiimit qaangiuppata malinnneqassapput. Saqqummiunneqarnermiit sivisunerusumik piffissaliisoqarsinnaavoq.

Inuit pillugit paassisutissanik suliarinninnerit

§ 19. Nalunaarut una naapertorlugu inuup akiuussuserneqarsimaneranut inissismaffia uppernarsarniarlugu inuit pillugit paassisutissanik, peqqissutsimut paassisutissat ilanngullugit, suliarinnittoqarsinnaavoq.

Pineqaatissiissuteqartarneq

§ 20. § 3, imm. 1 aamma 7, § 4, imm. 2 § 5, imm. 1, § 6, imm. 1 aamma 3, § 7, imm. 1 aamma 2, § 8, imm. 4, § 9, imm. 1, § 10, imm. 1, 3 aamma 4, § 11, imm. 1 aamma § 13, imm. 1 aamma 3-mik unioqqutitsisoq pinerluttulerinermik inatsit malillugu pineqaatissinneqarsinnaavoq.

Imm. 2. Ingerlatseqatigiiffit il.il. (inatsisitigut pisussaataitaasut pisinnaatitaasullu) pinerluttulerinermik inatsimmi kapitali 5-imik malittarisassat malillugit pinerluttulerineq pillugu inatsiseqartitsinikkut akisussaatinneqarlutik pineqaatissinneqarsinnaapput.

Atuutilersitsinermut atorunnaarsitsinermullu aalajangersakkat

§ 21. Nalunaarut ulloq 6. december 2021-mi atuutilissaaq, taamaattorli imm. 2 takuuk.

Imm. 2. Piffissami 6. decembarimiit 2021 7. decembari 2021 ilanngullugu § 3 imm. 4 malillugu PCR-mi misissortissimaneq annerpaamik akunnerit 72-nik pisoqaassuseqassaaq. Nalunaarut malillugu killilersuinerit, inerteqquteqarnerit, peqqusinerit il.il. 6. marts 2022 ilanngullugu atutissapput.

Namminersorlutik Oqartussat, ulloq 4. december 2021

Kirsten Fencker
Peqqinnissamut Naalakkersuisoq

/ Aka Olesen

Namminersorlutik Oqartussat

Imaneq 4
3900 Nuuk
E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit
Namminersorlutik Oqartussat inatsisinut toqqorsiviit
Naalakkersuisut